

迷人的臺語歌有夠奅

今年的「金曲獎」頒獎典禮猶原沖沖滾,音樂人「陳建瑋」又閣雙手攬「最佳臺語男歌手獎」恰「最佳臺語專輯獎」的獎座。伊穿一軀西裝有夠奅(phānn),徛佇台仔頂用『mài-kù』大聲喝:「唱臺語歌真 siap-phānn!」

干焦做兩塊唱片,就上台領 4 枝獎座,會使講是滿分的歌王!伊發心欲予全世界的人煞著咱的歌。2014年《30 出頭》的〈糞埽人〉溢滿一粒一的才情,『MV』心適閣趣味,譬相(phì-siùnn) 僥倖的大官虎,圓洗歹心烏漉肚的生理人,替悲苦的「無力者」發聲。2016年的《古倫美亞》 佮華語歌真有繃,〈烏鳥〉提名「最佳作曲人獎」,〈生份的情歌〉提名「最佳作詞人獎」,〈Would you be my girl〉提名「最佳編曲人獎」,出擢的水準正港無地看!

2016年的『諾貝爾』文學獎頒予偉大的美國歌手『Bob Dylan』,呵咾伊寫出詩情寄意的好歌,鑽迵烏暗的空縫,引馬光明的向望。咱臺語歌仝款有豐沛的詩情,情感樸實閣飽滇,參人生的酸甘苦澀上鬥搭。唱的人歡喜,聽的人煞心。古早有激五仁的〈天烏烏〉、活跳跳的〈牛犁歌〉,日人仔時代有溫馴的〈望春風〉,自由的年代有勇敢的〈島嶼天光〉,一字一句攏 歆放土地恰咱人的心聲。

「滅火器合唱團」恰國立臺北藝術大學鬥陣創作的〈島嶼天光〉成做民主運動的代表歌曲,對「太陽花學運」唱到總統就職典禮,得著第26屆金曲獎的「最佳年度歌曲獎」。臺語歌佮華語歌有比並,在來受著金曲獎的肯定,「江蕙」得著第1屆的「最佳女演唱人獎」,「洪榮宏」得著第2屆的「最佳男演唱人獎」,「林強」的〈向前行〉得著第3屆的「最佳年度歌曲獎」。「江蕙」的〈家後〉得著金曲獎2000年至2008年「我的最愛·一首歌」的榮譽,佇離婚率衝懸的無情時代,煉出翁仔某痴情的雞湯,點著(toh)婚姻靠岸的燈塔。

耳空內若貫入金曲三冠王「蕭煌奇」的歌聲,常在會目屎四淋垂。天團「五月天」唱〈志明佮春嬌〉,聽著真爽!歌王「劉德華」唱〈世界第一等〉,聽著真暢!第51屆金鐘獎的頒獎典禮『Rock』天王「伍佰(Gōo-pah)」押後演唱〈難忘的鳳凰橋〉,逐家聽甲醉茫茫。迷人的臺語歌,真正有夠命!

作者: 黃文達

☆詞彙學習☆

【一粒一】it-liap-it:非常優秀。

【有繃】ū-penn:不相上下。

【出擢】tshut-tioh:出類拔萃。

【鬥搭】tàu-tah:貼切、相襯。

【激五仁】kik-ngóo-jîn:搞笑、詼諧。

【有比並】ū-pí-phīng:平起平坐。

《臺灣閩南語常用詞辭典》http://twblg.dict.edu.tw